

Janiōłki, janiōłki...

A jō juzaś – za Paulkiym Wakułōm – kca Wōm cosik podciepnōńc skorzij naszego syjmonygo welōnku. Kcecie, to posuchejcie!

– Siema, ziōmolu! – Jarosław Małosrogi-Kaczyński dupiato przibiōł gōrzc ze swoim utrzidupskim Adamym Hofmanym.

– Wiyncyj luzu, chopie – rzecznik prasōwy PiS-u pokōzōł, jak wyglōndō modziokowo witaczka.

– Niy wylajzi mi to, bo pewnikiym mōm za knap moje palcyska – tuplikowōł jankornie Kaczyński.

– Tōż prezesie, mogymy sie tyrpnōńc baniōma, gymbami.

Hofman prasknōł ze byka, aże Jarosław Małosrogi kulnōł sie na ściana.

– Co? Jako... Cōż to bōło?! Jakeś sie łopowōżōł! – łozjargōł sie prezys PiS-u.

– Łōne, te modzioki majōm takō witaczka! – wymowiōł sie jego podkōmyndny.

– Musicie panoczku to pochytać, eżli kcecie trefić do tych modziokōw, do tych modych welmanōw, wybōrcōw!

– Letko ci pedzieć – mrōnknōł Kaczyński, kej masiyrōwōł czoło. – Jeżeś ino trzidziysci jedyn lōt stary, a mie pizło gynał dwa razy tela!

– Fajniście wōm ale idzie panoczku – tuplikowōł Hofman. – Mōcie panoczku wrodzōny talynt szalszpilerski. Nałōnczōs łostatnij kampaniji majstersko markirowōł pōn dobrego ōnkla we brylach, tōż tyż terōzki bez problymu zagrōcie panoczku srogigo przociela tych gōwniōrzy. Bydziecie panoczku barzij widziany niźli tyn Owsiak!

– I bydōm na mie welować?

– Na zicher, panoczku, na zicher! Na BANK!

Kaczyński smōrszczōł brwie.

– Jō niy kca, coby welowali na jakisik bank, łōni majōm na mie welować!

– To tak sie ino gōdō. Musicie panoczku spokopić modziokowō gōdka.

– Mōm lepszyjszy knif, moc lepszyjszy pōmys – zmyszōł sie prezes haźlikowych. Wrajżymy na nasze listy deczko modych ludzi. Nōjlepszij... jake mode dziōłchy!

– Szprymnie, grajfnie prezesie! – pochwōlōł Hofman. – Już widza nagōwki we cajtōngach: Janiōłki Kaczyńskiego!

Zmarkotniōł Hofman ale...

– Ino co ze naszymi starymi kamratkami... Nelli, Beta Kympe, Gosiewskō, Wrōblinō, Sobekō... Zyta...

– Take śnich janiōłki jak ze cigowyj rzici trōmpyjtki – fuknōł Kaczyński. – Baji te nowe wrājżymy na łostatnich placach na listach. Przecamć blank niy kcymy, coby ftorōś śnich richtik dokulwitała sienōm do Syjmu?

– Klar, iże niy! – Hofman zatar gōrzc. – Łostało nōm ino znōjść jake fajnije dupy!

– Coś pedziōł? Suchōm! – smorszczōł brwie Jarosław Małosrogi.

– Nō, Laski! Dupyncje! Foczki!

- Co takigo? Blank niy miarkuja!
- Nō... KOCIAKI!
- A! To trza bōło zarôzki tak gôdać!!!

Ojgyn z Pnioków